



Kementerian Perdagangan Dalam Negeri
dan Kos Sara Hidup



PERBADANAN HARTA INTELEK MALAYSIA
INTELLECTUAL PROPERTY CORPORATION OF MALAYSIA

KENYATAAN MEDIA

GARIS PANDUAN BAHARU HAK CIPTA PERKUKUH HAK PENGGUNA DAN PENGGIAT SENI

PETALING JAYA, 27 MAC 2025 – Pengguna karya hak cipta dan penggiat seni industri kreatif khususnya industri muzik menyambut baik pengenalan Garis Panduan Hak Cipta (Organisasi Pengurusan Kolektif) 2025 yang dikeluarkan oleh Perbadanan Harta Intelek Malaysia (MyIPO). Garis panduan ini yang akan mula berkuat kuasa pada 16 Januari 2026 diyakini dapat memperkukuh perlindungan hak cipta serta memastikan organisasi pengurusan kolektif (CMO) beroperasi dengan lebih telus, cekap dan adil.

Pada 25 Mac 2025 telah diadakan sesi libat urus bersama wakil persatuan pengguna karya hak cipta yang terdiri daripada Badan Penyiaran Tempatan, Persatuan Pemunya Hotel Malaysia (MAHO), Persatuan Hotel Malaysia (MAH), Persatuan Hotel Bajet Malaysia (MyBHA), Persatuan Rangkaian Peruncitan Malaysia (MRCA), Persatuan Pengurusan Kompleks Malaysia (PPKM) dan Radio Komersial Malaysia (CRM). Manakala sesi libat urus pada hari ini melibatkan para penggiat seni tempatan merangkumi penulis lirik, penggubah lagu, penerbit muzik serta penyanyi dan pemuzik rakaman bunyi. Selain memberi penerangan terperinci mengenai garis panduan, sesi ini juga menjadi platform bagi mendapatkan maklum balas dan pandangan daripada pihak-piha berkepentingan.

Pengenalan garis panduan ini merupakan lembaran baharu bagi industri hak cipta Malaysia, mencerminkan komitmen Kerajaan dalam memperkasa ekosistem hak cipta serta memastikan pemantauan yang lebih jelas terhadap CMO. Dengan garis panduan ini, industri kreatif negara dijangka lebih tersusun, memberikan manfaat bukan sahaja kepada pengguna karya hak cipta dan penggiat seni tetapi juga kepada CMO dalam menjalankan tanggungjawab mereka secara lebih berkesan.

Garis panduan ini telah dirangka secara menyeluruh dengan mengambil kira pandangan semua pihak berkepentingan, termasuk CMO, pengguna karya hak cipta, penggiat seni dan pihak kementerian. Pendekatan ini memastikan dokumen tersebut bersifat adil, tidak menyebelahi mana-mana pihak, dan mampu memenuhi keperluan industri dalam jangka panjang.

Pengenalan garis panduan ini juga merupakan satu langkah proaktif susulan pindaan Akta Hak Cipta 1987, yang mula berkuat kuasa pada 18 Mac 2022. Pindaan ini memberi kuasa kepada Pengawal Hak Cipta untuk menggubal dan menguatkuasakan garis panduan bagi memastikan tadbir urus CMO lebih tersusun dan efektif.

Melalui garis panduan ini, semua CMO diwajibkan untuk memastikan pengurusan dalaman mereka mematuhi prinsip tadbir urus yang baik, termasuk penyelarasan dokumen konstituen, pelantikan lembaga pengarah, serta mekanisme pengundian yang lebih telus. Selain itu, setiap CMO diwajibkan mengemukakan dokumen pembaharuan perisytiharan tidak lewat daripada 60 hari sebelum tamat tempoh perisytiharan yang dikeluarkan oleh Pengawal Hak Cipta.

Sebagai sebahagian daripada usaha memastikan pematuhan yang berkesan, MyIPO akan melaksanakan program advokasi sepanjang tahun 2025 bagi meningkatkan pemahaman serta kesedaran mengenai garis panduan ini dalam kalangan CMO, pengguna karya hak cipta, dan penggiat seni.

Garis panduan ini merupakan satu langkah penting dalam memperkasakan industri hak cipta di Malaysia, sejajar dengan prinsip ketelusan, akauntabiliti, dan tadbir urus yang baik (*Transparency, Accountability, and Good Governance – TAG*). Dengan pelaksanaannya, Malaysia dijangka dapat mewujudkan ekosistem hak cipta yang lebih mampan, seimbang, dan memberi manfaat kepada semua pihak dalam industri kreatif.

TAMAT

Untuk maklumat lanjut mengenai kenyataan media, sila hubungi:

ENCIK NOOR ALIFF BIN MUSA
Penolong Pengarah Bhg.Hak Cipta
T: 012-2693831
E: aliff@myipo.gov.my

ENCIK AKHTAR BIN SAHARI
Ketua Komunikasi Korporat
T: 012-6725667
E: akhtar@myipo.gov.my

Perbadanan Harta Intelek Malaysia,
Menara MyIPO, PJ Sentral,
Lot 12, Persiaran Barat, Seksyen 52,
46200 Petaling Jaya, Selangor.
Tel : 603 – 7496 8900
Emel : ipmalaysia@myipo.gov.my
Laman web : <http://www.myipo.gov.my>

PERBADANAN HARTA INTELEK MALAYSIA (MyIPO)

MyIPO merupakan sebuah agensi di bawah Kementerian Perdagangan Dalam Negeri dan Kos Sara Hidup (KPDN) bertanggungjawab untuk pembangunan dan pentadbiran sistem hak harta intelek (IPR) di Malaysia. MyIPO menyediakan infrastruktur perundangan yang kukuh dan sistem pentadbiran yang berkesan untuk meningkatkan inovasi dan kreativiti.